



**Sud Bosne i Hercegovine**  
**Суд Босне и Херцеговине**

---

**Broj: S1 3 Iž 037931 20 Iž**  
**Sarajevo, 22.10.2020. godine**

Sud Bosne i Hercegovine, u vijeću Apelacionog odijeljenja sastavljenom od sudija Dinke Bešlagić-Čovrk, kao predsjednika vijeća, Srete Crnjak i Vesne Trifunović, kao članova vijeća, odlučujući o žalbi Bore Krsmanić, Neđe Bekića bb, Šekovići, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 22.10.2020. godine, donio je

**R J E Š E N J E**

**Žalbe se odbijaju.**

**O b r a z l o Ź e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što je isti registrovan na više različitih adresa.

Filip Jokić i Kosarka lopta su dana 03.10.2020. godine putem e-mail adrese dostavili žalbu za Boru Krsmanić. U žalbi izjavljenoj od strane Filipa Jokić se navodi da je provjerom utvrdio da Bora Krsmanović nije registrovan, te da se uredno prijavio da glasa van BiH na adresu Bulevar Oslobođenja 48, Novi Sad, te traži da glasa na pomenutoj adresi. U žalbi izjavljenoj od strane kosarke lopte ([loptakosarka@yahoo.com](mailto:loptakosarka@yahoo.com)) se navodi da prijava Bore Krsmanovića nije prihvaćena za glasanje izvan Bosne i Hercegovine, te dostavlja adresu Starine Novaka 30, Kovači, 36 000 Kraljevo. Nadalje navodi da je dostavljena ovjerena izjava kojom potvrđuje da je tačno sve što je navedeno u prijavi kao i e-mailu.

Centralna izborna komisija Bosne i Hercegovine je u odgovorima na žalbu predložila se iste odbace kao nedozvoljene ili odbiju kao neosnovane.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, utvrdila da su za žalitelja Krsmanović Boru dostavljene dvije (2) prijave na obrascu PRP-1-Prijava za glasanje izvan BiH, te su navedene različite adrese na koje će biti upućen glasački materijal. U konkretnom slučaju u prvoj prijavi je navedena adresa Starine Novaka 30, Kovači, 36 000 Kraljevo, Srbija, dok je u drugoj prijavi navedena adresa Bulevar Oslobođenja 48, 21000 Novi sad, Srbija.

I po shvatanju apelacionog vijeća, druga dostavljena prijava žalitelja Bore Krsmanić se ne može smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositelj žalbe podnošenjem druge prijave nije ukazao da imaju saznanja o podnesenoj prvoj prijavi, kada bi se moglo cijeniti da druga podnesena prijava predstavlja promjenu podataka o boravištu u inostranstvu.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1 Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1 citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako podnositelj žalbe nije Centralnoj izornoj komisiji BiH dostavio, u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjeva da bude registrovan prava adresa njegovog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužan dokazati podnositelj prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA  
S U D I J A**

**Dinka Bešlagić-Čovrk**